

四庫全書

子部

欽定四庫全書

子部  
紺珠集卷七

詳校官中書<sub>臣</sub>張姚成

員外郎<sub>臣</sub>牛稔文覆勘

總校官庶吉士<sub>臣</sub>倉聖脉

校對官庶吉士<sub>臣</sub>吳裕德

謄錄舉人<sub>臣</sub>蔣傳馨

欽定四庫全書

紺珠集卷七

宋 朱勝非 撰

水衡記

闕名

凌解水

黃河正月水名

桃花水

二月三月水名

麥黃水

四月水名

瓜蔓水

五月瓜延蔓故以名

礬山水

六月水名

萩苗水

七月八月蒺藜花故以名

登高水

九月水名

復槽水

十月水落復故道

蹙凌水

十一月十二月水斷復結

乾膜子

溫庭筠

短筆畫地起草

梅權衡入試青玉案賦於庭樹下以短筆畫地起草

快語

蠲蕩昏蒙使之快語

乾牋

不爵不觥非炮非炙能說諸心庶乎乾牋之義

大郎罷相二郎拜相

韋承慶除禮書嗣立作平章事時謂大郎罷相二郎

拜相

分無堂食

張文瓘分無堂食食則傷痛

雙與

張越石楚金同舉有同以兄弟不可兩收欲俱退李  
勣嘆曰貢舉本求榮何妨兩雙與

國奢

竇懷貞甥韋后乳母時號曰國奢懷貞欣然

著毛蘿蔔

蕭嵩欲注文選見馮光進釋蹲鴟云今之茅子是著

毛蘿蔔嵩大笑

班固非孟堅

張由古無學業對衆嘆班固文章不入文選衆對以  
兩都賦燕然銘等由古曰此是班孟堅非固也

長孫歐陽相嘲

無忌嘲詢曰聳膊成山字埋肩不出頭誰教麟閣上  
畫此一獼猴詢應聲曰索頭連背暖襠褡畏肚寒只緣  
心溷溷所以面團團上大笑



御史胡

則天問張元一外有何可笑元一曰朱前疑著綠綬  
仁傑著朱問知微乘馬馬吉甫乘驢將名作姓李千  
里將姓作名吳栖梧左臺胡御史右臺御史胡御史胡  
禮也胡御史蕃人為御史者天后大笑尋除別官

奚毒

附子也莖烏頭也

貳負

漢宣帝時上郡山崩得一物長數丈髮丈餘彷彿狀人  
蠢蠢而動問不答劉向云出山海經此貳負之臣殺  
寔窳有罪帝梏之於䟽屬之山有胎息之術

輕紅

崔氏青衣崔與柳生厚死猶冥合輕紅從焉

孤翁

何讓之春經原陵見一老翁歌曰野田荆棘春閨閣  
綺羅新出入頭上日死生眼前人欲知我家在何處

北邙松柏正為隣又曰洛陽女兒羅綺多無奈狐翁  
老去奈爾何讓之逐入草中作一狐遁去案上得  
文字一帖紙如灰過不可曉解有曰何以充喉吐納  
太虛何以蔽裸霞裙雲袂之語後狐化僧以三百縑  
求之不與作其弟奪去後內庫失縑獲於讓之所因坐死  
太一

莆田陳鸞生子不慧名智奴楊過遊梁遇一道士曰  
吾奉天帝使往泰山此東北十里圃田店有太一在

焉乃正衣冠而去過異之詢於父老曰店陳智奴十三矣未嘗言適道士來謁既去而言

河瀆親翁

郭汾陽鎮蒲欲造浮橋而激流毀墀公酌酒許以小女妻之其夕水平木立墀上遂成橋而小女尋卒因塑廟中人因立公祠號河瀆親翁

猖狂之名滿天下

牛僧孺制科在捷臺參韋乾度不知而問之僧孺甚

訝韓退之曰公猖狂之名滿天下韋尚不知何恠焉  
銀海

裴鈞僕射大宴巡官裴弘泰後至鈞不悅弘泰曰請  
在座銀器盡斟酒滿之隨飲以賜弘泰可乎鈞許之  
遂竭座上小爵至觥船凡飲皆竭隨即填于懷有銀  
海受一斗以上以手捧而飲盡踏其海捲抱之索馬  
而去鈞使人問弘泰方箕踞而坐秤所得銀器二百  
餘兩不覺大笑

房琯惟欠不言

房琯為馮翊尉事陸象先孔目官黨芬相遇避遲琯  
決之入白象先曰如芬所犯決亦得不決亦得琯謝  
之公曰謝亦得不謝亦得後值公入召琯相遇留琯  
琯至黑不言薦為御史曰房琯為人百事不欠惟欠  
不言矣是堪用也

廬山記

陳舜俞

匡裕先生

姓匡名裕殷周之際遜世隱居廬于此山

杏林

董奉每治人病病愈即令種杏五株遂成林

冷暖泉

龍首下有甘泉冷暖與寒暑相變

香爐峯

孤峭特起氣籠其上氤氲若香烟

山帶

天將雨白雲冠峯俗謂之山帶不三日必雨

浪井

灌嬰所開極深邦人謂之浪井蓋以湓江有風浪井  
水輒動太白詩浪動灌嬰井

碧虛上監

董奉上升號碧虛上監

分風

宮亭湖神能分風上下船



九天採訪

玄宗夢神仙稱九天採訪巡糾人間欲以廬山作宮  
基址木彩不求而足

神運殿

遠法師初至夢神告曰此處幽靜足以棲神忽於夜  
半雷雨明旦視之素沙匝地良木鬱然因作殿名神  
運

龍泉

遠師欲作寺苦無水以杖刺地泉即湧出後旱祈之  
有龍出焉

三笑圖

遠公與陶元亮陸脩靜語道不覺過虎溪因相與大笑  
故世作三笑圖

虎溪

遠公送客過此虎輒號鳴

白蓮社

遠公與十八賢同脩淨土

虎跑泉

遠公與社賢遊此峯虎跑石出泉

聰明泉

殷仲堪與遠公談易林間泉傍師愛仲堪辯博乃指泉曰君辯如此泉涌因號聰明泉

香谷

慧水禪師浴于此有芬馥之氣因名

辟蛇行者

遠公初來山多蛇虫行者善驅蛇蛇為之盡號驅蛇行者蓋山神云

遊山虎

山有一虎未嘗傷人時見行跡因謂遊山虎

醉石

淵明所居栗里兩山間中有大石仰視懸瀑可坐十人

墨池

歸宗寺右軍所居中有墨池

鸞谿

昔人謂歸宗有翔鸞展翼之勢因名其谿

舩底池

吳猛乘舩龍負而行舟人聞觸林木聲懼而竊窺龍  
遂委去山頂今有敗舩

玉膏

吳猛與弟子度石梁見金闕玉房地皆五色文石一  
老人以玉杯盛甘露漿授猛又設玉膏弟子取一寶  
器忽雲霧繞梁指還之得反

羣玉洞府

秦亂有十三人棄官學道經于此山內三武士唐建  
威李德及宋雲刀欲遂棲焉十人曰初志歸羣玉洞  
府豈可中道而輟言訖一夕雷雨化成二溪溪中有  
盤石上有玉簡天篆曰神化靈溪金簡標題真人受

指玉府潛棲

停霞寶輦

陸脩靜市藥京邑文帝作停霞寶輦使徐湛宣旨留  
之不可後帝有太和之事

崇虛館

明帝強招之作崇虛館通仙堂以待之使之講道

潮泉

雞籠山下有澗水深一尺餘泉湧如潮晷刻不差朔

望尤大

金門羽客

保大中道士譚紫霄賜號金門羽客本閩中人

擘流

宮亭湖神能分風擘流曹毘詩云分風為二擘流成

兩

廬君主簿

昔吳郡太守張公直過神女觀侍婢指女戲妃像其



妻夜夢致聘怖而遽發中流舡不行闔船驚曰豈愛  
一女合門受禍公直不忍令其妻下之妻乃以兄女  
代之公直知下兄女怒曰吾何面於當世復下已女  
水中將渡遙見二女於岸側一吏白曰吾廬君主薄  
敬君之義悉還二女皆無恙

江湖桎梏

或問周續之時踐王庭何也笑答曰心馳魏闕者以  
江湖為桎梏情致兩忘者市朝亦巖谷耳

尋陽三隱

劉遺民陶淵明周續之

祿如腐草

衡陽王義季問宗炳曰欲屈先生以重祿可乎曰祿如腐草衰盛幾何

文房四譜

蘇易簡

紙為良田

劉氏小說秦洪赴洛人間吳中舊業曰紙為良田筆

為鋤耒墨為稼穡義理為豐年

半面啼笑

幽冥錄賈弼夢易其頭翊日人見皆驚遂能半面啼

半面笑

硯凍開

崔寔四民月令正月研凍開命童幼入小學十一月硯

水冰命讀論語

天雨降羅牋

異苑張仲舒在廣天雨降羅牋甚多

悲剡溪古藤文

舒元興作悲剡溪古藤文云今之為文者皆天關剡  
藤者也藤生有涯為文者無涯所以弔剡溪藤以寄  
其悲

廣州記 顧微

五羊

昔高固為楚相五羊啣穀至其庭以為瑞因以五羊

名其地六國時廣屬楚

水弩

水弩蟲四月上弩射人八月後却弩

定命錄

呂道生

肩尾之歎

令狐相未達作詩自歎云何日肩三署終年尾百僚

伏犀貫玉枕

袁天剛相竇軌伏犀貫玉枕當於益州立功名果然

龜息

袁又相李嶠曰睡則氣從耳出名曰龜息必貴

鄴中記

闕名一作陸翹

莫難

扇之奇巧者名曰莫難

錦名

錦有大登高小登高又有大小博山大小茱萸之名

鳳詔

詔書以五色紙著木鳳口中飛下端門謂之鳳詔也

法苑珠林

僧道世

人生如寄

支遁在剡謝安與書曰人生如寄耳終日戚戚遲君  
來晤言消之

般若臺

陳文達持誦金剛經有人入冥見築臺云名般若臺  
待文達也

諸天雨

兜率天雨摩尼珠護世城雨美膳阿脩羅天雨兵杖  
閻浮提世界雨清淨之水

荊州記

盛弘之

酉陽逸興

酉陽山石穴中有書千卷世謂之酉陽逸興

分風

洞庭湖神過客祈禱必驗分風送船



瀟湘記 李隱

玉象之

玉精曰玉象之枯木精曰李時金杯精曰黃直

南山木強人

馬舉鎮淮南有一叟謁之稱南山木強人能論兵法  
驗之乃一棋局耳

北堂書鈔 虞世南

絕編折擯

孔子晚喜易韋編三絕鐵撻三折

成都記 盧求

六詔

南蠻六部本無統屬天子每下詔各分一封謂之六詔唐開元末節度使王昱受賂乞合為一乃封大酋蒙歸義為雲南王始獨稱南詔既盛乃為邊患

河東記 薛漁思

常持滿

汝南王飲葉靜能葉曰有一生徒能飲當令來謁翌  
日有通謁者曰道士常持滿見之侏儒也談胚渾一  
道飲以酒五斗乃醉倒是一瓮爾

啟顏錄

侯白

臣卿尚少

後魏孫詔為少府少卿帝問卿年何老答曰臣年雖  
老臣卿尚少遂遷正

景龍文館記

武平一

脩文館學士

唐中宗景龍二年置脩文館學士大學士四人象四  
時學士八人象八節直學士十二人象十二月遊宴  
悉預最為親近也

造化小兒

杜審言好大言臨終宋之問等往問之乃曰甚為造  
化小兒相苦僕在久厭公等今死固當慰心但恨不  
見替人爾言訖遂絕

閨重九

閨九月九日作宴賦詩李嶠云閨節開重九

栢梁體

連句為栢梁體一句一韻

綠情紅意

趙彥若剪綵花云花隨紅意發葉就綠情新

國奢

竇從一為御史大夫中宗諭以卿久無中饋為卿成

禮歲除於守歲殿宴設極盛中席迎其婦與之同坐  
徐徐却扇去花眊之乃一老嫗帝與侍臣皆大笑後  
知是皇后乳母從一由是曲延中宮之遇有國奢之  
號

齒錄牙緋

沈佺期作回波詞云身名已蒙齒錄袍笏未復牙緋  
帝大笑遂賜之

蹀馬之戲

宴吐蕃使作蹀馬之戲皆五色綵絲金校具裝於鞍  
上加麟首鳳翅樂作馬皆隨之蹀足宛轉中節胡人  
甚大駭

四部書

薛稷知集庫馬懷素知經庫沈佺期知史庫武平一  
知子庫通謂之四部書

儒首

祝欽明膽博號一時儒首

後罰三杯

宴白鹿觀御詩序云人題四韻後罰三杯

天歡

李宗楚等謝曰既陪天歡不敢不醉

天杯

又曰敬舉天杯飲

辟幄

宴韋嗣立莊云松門駐旌罕辟幄列簪裾



綸省

除中書舍人李乂為學士云綸省推高

文江

鄭愔聯句云文江學海思濟航

桃花行

李嶠作桃花詩帝令擇二十篇入樂府謂之桃花行

帖綵毬

寒食賜錫粥帖綵毬鏤雞子

拔河之戲

清明節命侍臣為拔河之會以大麻絙兩頭繫十餘小索每索數人執之以挽力弱為輸時七宰相二駙馬為東朋三相五相為西朋僕射韋巨源少師唐休璟以年老隨絙而踣久不能起帝以為笑樂

細柳拳

上已祓禊賜近臣細柳拳云帶之免蠱毒瘟疫

文檉綺栢

日就殿以文櫪綺栢為材

合笙歌

內殿奏合笙歌其言淺穢武平一諫曰妖胡娼妓街  
童市女談妃主之情貌列王公之名質詠歌舞蹈舞號  
曰合笙不可施於宮禁也

八風舞

內宴祝欽明作八風舞以手據地作諸醜狀盧藏用  
曰祝公使五經掃地矣

秘掖

宋之問曰西域秘掖此禁仙流

御史臺記

韓琬

癡牀

侍御史號雜端最為雄劇臺中聚會則於坐南設橫牀號南床又曰癡床登此床者倨傲若癡焉

御史本草

唐賈忠言撰御史本草以裏行為合口椒最毒監察

為開口椒微毒殿中為蘿蔔侍御史為脆梨言漸入佳  
味遷員外郎號甘草言可以久安故也

五墨三仍

唐左臺御史還南省仍供奉者三墨勅授者五右臺  
譏之以為五墨三仍

百官本草

唐侯味虛著百官本草謂御史云大熱有毒主祛邪佞  
杜奸回振冤滯止淫濫尤攻貪濁畏遠使惡褻直忌

按權豪外州出者尤良用日炙乾硬可用服之長精神減姿媚久服可以令人冷峭

畿尉六道

畿尉有六道入御史為佛道入評事為仙道入京尉為人道入畿丞為苦海道入縣令為畜生道入判司為餓鬼道

三水小牘

皇甫牧

天柱峯玩月

趙知微有道術皇甫玄真等師事之中秋積陰不解  
衆惜良辰知微曰可備酒肴登山柱峯玩月既出門天  
色開晴及登山峯月色如晝會飲月落方歸下山則  
淒風苦雨陰晦如前

### 魚鏡

元稹登黃鶴樓望江濱有光若星使人就視得一鯉  
剖腹得古鏡如錢大背有雙龍其龍口中常吐光焉  
登蓮華峰篝火

王玄冲欲登蓮華峯寺僧笑之玄冲曰到峯頂當構烟為信翌日攜火而登僧候之數日果有烟起留二旬乃復下僧問之峯頂有池適菡萏盛開可愛然於其中又有破錢舟存焉

廬山精

劉秉仁為江州刺史自京將一橐駝去郡放之廬山下野人見而大驚共射殺之乃以狀白州曰獲廬山精於某處劉命致之乃所放駝耳



岷山張蓋雨滂沛

安定郡有岷陽峯峯上有池若雨則雲起池中若車  
蓋然故其里諺曰岷山張蓋雨滂沛

淮南子

劉安

悲絲泣岐

墨翟見練絲而悲為其可以黃可以黑楊朱見岐路  
而泣謂其可以南可以北皆本同而末異也

白猿號

楚王獵見白猿射之猿善避箭莫能中乃命養由基射之方執弓而猿乃抱樹而號始知由基神射也

### 曾泉

日臨曾泉是謂早食注云早食時也東方多水故曰

### 曾泉

### 高春下春

日至於淵虞是謂高春至于連石是謂下春注云未暝時上蒙先春曰高春欲暝下蒙曰悉春曰下春

桑榆

日西垂景在桑端謂之桑榆

桐魚請雨

董仲舒請雨用桐木魚

乾鵲

鵲之別名乾音干

女夷

二月之夕女夷鼓歌以司天和女夷神名

槐市

太學曰槐市

子子

水中倒跂曰子子

搜神記

干寶

種玉得婦

陽雍伯嘗設義漿以給行旅一日有人飲訖懷中取石子一升與之曰種此可生美玉并得好婦如言種

之有徐氏女極美試求之徐公曰得白璧一雙即可  
乃於所種得璧遂娶徐氏

### 赤虹化玉

孔子修春秋製孝經既成齋戒向北斗告備忽有赤  
虹自天而下化為黃玉刻文孔子跪而受之

### 青蚨

青蚨似蟬而稍大生子草間如蠶取其子母即飛來  
以母血塗八十一文以子血塗八十一文每市物或

金史卷之七  
先子錢或用母錢皆復飛歸輪還往來無已

鳩化帶鉤

長安民有鳩飛入懷中化為金帶鉤子孫遂富

阿香車

有人途次寄宿道傍草舍惟女子居之夜半門外有  
小兒呼曰阿香官呼爾推雷車女子乃去追眎其舍  
乃一古塚耳

龍精

蠶曰龍精

神光照舍

應姬者生子而有神光照舍四子皆以才名顯

審雨堂

盧汾夢入蟻穴見堂宇豁開題榜曰審雨堂

笑電

電曰笑電

鵠齋

北史禁門籬曰鵠籬

長嘯呼風

趙炳從舟人乞渡不獲乃坐水中長嘯呼風而濟

呂氏春秋

呂不韋

鷄跖

善學者如齊王食雞必食其跖

水雲魚鱗

山雲草莽水雲魚鱗旱雲如烟雨雲如波



六戚

父母妻子兄弟謂之六戚

熊席

衛公冬鑿池言不寒范春曰君衣狐裘坐熊席四隅置火所以不寒

委裘

堯之官若委裘言少事也

夏籥

禹立命皋陶作九成以昭其功

承雲樂

顓頊令飛龍作樂效八風之音名曰承雲

葛天八闋

葛天氏之樂三人探牛尾捉足以歌八闋捉足猶蹠

足之謂

論衡

王充

細柳

旦出扶桑暮入細柳細柳西方日入之地

一角羊

獬豸一角羊也性知有罪者即以角觸之

籥動

赦令將至繫室籥動有所感也

史匠

能雕琢文書者謂之史匠

堯何力於我

堯時百姓閒暇擊壤於途觀者曰大哉堯之德擊壤者  
曰吾日出而作日入而息鑿井而飲耕田而食堯何  
力於我

腹育

蟻螭化腹育腹育化蟬

木囚

李子長欲知囚情以梧桐為人蘆葦為牢當罪木囚  
不動或寬木囚乃奮

原化記

皇甫氏

栢葉仙人

田鸞入華山見黃冠師指樹曰此長生藥也教以服之法後得道夢朝上清列仙皆呼栢葉仙人

松花酒

有老人雪中訪崔希真希真飲以松花酒老人云澁無味以丸藥投之酒味頓美

鍊白兔

金定四庫全書  
卷七  
王卿為天師守丹竈竊發其封窺之一白兔躍出衆  
皆曰丹已去矣忽有一道士化為鶴飛去須臾擒兔  
來遂復投之於竈

以珠易餅

賀知章嘗謁賣藥王老問黃白術持一大珠遺之老  
人得珠即令易餅與賀食賀心念寶珠何以市餅口  
不敢言老叟乃曰慳吝未除術何由得

寶母

魏生嘗得一美石後有胡人見之云此寶母每月望設壇海邊石上可以集珠寶

### 禍斗

義興吳堪為縣吏家臨荆漢忽得一大螺已而化為女子號螺婦縣令聞而求之堪不從乃以事虐堪曰今要蝦蟇毛鬼背二物不獲罪之堪語螺婦即致之令乃謬語曰更要禍斗堪不曉又語螺婦曰此獸也須臾牽至如犬而食火糞復為火令取火試之忽遺

糞火燒縣宇令死焉

廣異記 戴胃

鞭爛鞍朽

有人乘馬山行見洞中二老人樗蒲乃以鞭拄地而  
看俄忽鞭爛而鞍朽

金羊玉馬

有積雪久不消掘地得金羊玉馬高三尺許

沙苑射鶴



天寶中玄宗重陽日獵於沙苑有鶴孤飛帝射中帶箭西南而去益州道觀第一院有青城山道士徐左卿寄寓一日自外持一箭來曰吾行山中為飛矢所傷已無恙因掛於壁書其日月且言後年箭主到此付之後明皇幸蜀遊此觀乃見其箭

王弼作守門童

辰州有人射猪逐入石室見老翁問何射猪曰傷未即呼一童子責之曰何不謹門令猪出射者問何人

童子曰此翁上帝使為諸仙講易我即王弼受易未  
通遂罰守門

摩頂松

玄奘往西域於靈巖寺見有松手摩其枝曰吾西去求佛教  
汝可西長吾歸即東回使吾弟子輩知之既去松枝  
年年西指一年忽東回弟子曰教主歸矣果還至今  
謂之摩頂松

蛇化銅劍

武勝之嘗於江灘見雷公逐一黃蛇或以石投之鏗  
然有聲雷公飛去乃一銅劍有文云許旌陽斬蛟第  
三劍

鸚鵡喚花開

許漢陽舟行迷入一溪夾岸皆花苞忽一鸚鵡喚花  
開一聲花苞皆拆中各有美女長尺許能笑言至暮  
花落女亦隨落水中

鬱輪袍

王維素為岐王所知善琵琶將應舉告王為地王曰  
子舊詩可錄數篇及作一琵琶曲因引維至一貴戚  
家自彈其曲貴戚問何名曰鬱輪袍大愛之因出其  
詩曰此非伶人乃能文之士遂為黃緣是年為舉首  
玉英粉

有道士持湯餅語人曰此玉英粉食之七日必羽化  
星靨

華岳三夫人媚李湜云笑開星靨花媚玉顏

解鰲如山

有海賈每見兩山相對於波間各高數丈已忽不見  
舟人云此是巨鰲鰲也

三苗

呂筠卿月夜泊君山飲酒吹笛忽一漁舟來相並  
中有一老人持一蘆以示呂大者如合拱曰此天樂也  
不可吹次者如世所吹者曰洞府仙人樂也小者筆  
管大此人間之笛也遂吹其小者始一二聲波濤沆

金匱要略卷七  
養又三五聲舟楫掀舞呂大恐老人止笛朗吟曰湘  
中老人讀黃老手援紫藟作碧草春至不知湖水深  
日暮忘却巴陵道忽不見

神人詩

有神人降於鄭絳家吟詩云忽然湖上片雲飛不覺  
舟中雨濕衣折得荷花渾忘却空將荷葉蓋頭歸

老君剪舌

唐夔州道士王法朗舌長呼字不正乃日誦道德經

後夢老君剪其舌覺來語言乃正

石阿措

崔玄微嘗遇美人其一曰石阿措一曰封十八姨封則風神石即石榴也

山丈山姑

山魃嶺南皆有一足反踵手足皆三指雄曰山丈雌曰山姑夜叩人門雄求金繒雌求脂粉

敬元頡

寶鏡名

破山劍

寶劍名可破山取寶

名畫記

張彥遠

精紙

王濛自言我嗜酒肉好書善畫人有美酒珍食精紙

何所不可

世情未盡



戴安道畫佛庾道季見之曰神氣太俗蓋由世情未盡耳

畫本

隋鄭法士求田楊畫本楊指宮闕人物衣服車馬曰此吾畫本也

練障為衣

有人收張藻畫松石障既死人購之其妻已練為衣唯得兩幅雙松一石松存焉傳後世以為名筆也

廐馬師

帝問韓幹曰內廐馬皆臣之師也

黃庭經

闕名

藍珠闕

上清云間居藍珠闕作七言注云秘要經仙宮有陽  
寥之殿藍珠之闕七纓之房

胎仙

琴心三疊舞胎仙注云和琴也疊積也存三丹田使

和積如一則曰胎仙猶在腹中但有氣而無息也

神蓋

注神蓋道也

三素雲

上有章注云丹田上中下俱有白氣又云日光有紫  
青絳三色謂之三素雲

赤珠靈

天中章云赤珠靈裙華胥絜注云此言心神所服之

色然也

蒼華

至道章云髮神蒼華字太元注云白黑謂之蒼首上  
故曰太元

太和官

口為章云口為玉池太和官注云為調柔百味和適  
五臟

玉練顏

注漱咽靈液則肌膚若冰雪也

精根

腦神曰精根字泥丸注泥丸腦之象也

明上

眼神明上字玄英注在首上故曰明上

玉隴

鼻神玉隴字靈堅注隆龍之骨象如玉

空間

耳神空間字幽田注靜則能聽幽田神所舍也

羅千

齒神崿鋒字羅千注摧衆物之義

丹元

心神丹元字守虛注心為臟腑之元南方火之色也

皓華

肺神皓華字虛成注肺為華蓋皓白也

龍煙

肝神龍煙字含明注東方青龍之色

育嬰

腎神玄冥字育嬰

常在

脾神常在字菟停注脾中央即黃庭之宮曰常在

龍曜

膽神龍曜字威明注膽色青光故曰龍曜

白元君

肺部注曰白元君主肺宮之神

玉羅

心部丹錦緋裳披玉羅注心色青上有白氣象玉

尺宅

脾部尺宅面也

桃康

脾長章丹田下神名曰桃康

玉廬



注玉廬鼻也

黃野

靈臺章脾曰黃野

三關

三關章口為天關手為人關腳為地關

瓊室

骨之象

寸田

謂三丹田各長一寸故曰寸田

五牙

當念章存漱五牙不飢渴五牙者五行之生氣配五

臟

六丁

老君六甲符圖云丁卯神馬卿丁丑神趙子玉丁亥  
神張文通丁酉神臧文公丁未神石叔通丁巳神崔

巨卿

伏牛

五行章伏牛幽關羅品列注云伏牛腎象腎為幽關

雌一

父曰泥九母曰雌一注云明堂中有君神洞房中

有夫婦丹田中有父母

鬱儀結鄰

鬱儀奔日之仙結鄰奔月之仙

靈芒

口銜靈芒携五星注口吐五行色雲氣

吞日月法

吞日法呪曰𩑦


云

十六字自有五色流霞入口中

吞月法呪曰𩑦

云

二十四字自有玉色光入口中



紺珠集卷七

欽定四庫全書

子部  
紺珠集卷八

詳校官中書<sub>臣</sub>張姚成

員外郎<sub>臣</sub>牛稔文覆勘

總校官庶吉士<sub>臣</sub>倉聖脉

校對官庶吉士<sub>臣</sub>吳裕德

謄錄監生<sub>臣</sub>尤端綿

欽定四庫全書

紺珠集卷八

宋 朱勝非 撰

古樂府

闕名

夕臺神帳

劉繪巫山高云散雨收夕臺行雲卷神帳

烏封鯉素

王瑳長相思烏封歸飛斷鯉素還流絕

犀羈

劉孝威驄馬行  
犀羈玉鏤鞍  
寶刀金錯鞘  
鏤衢鞍

徐陵驄馬行云  
白馬號龍駒  
雕鞍名鏤衢  
清酒特炙

陸機百年歌  
清酒特炙  
柰樂何  
葱粢

陸機當置酒云  
三益既歲  
蕤四始  
方葱粢  
後薪前魚

陸機怨詩後薪隨後積前魚復誰憐

瑪瑙鍾

湘東王云幄中清酒瑪瑙鍾裙邊雜佩琥珀龍

璿霜

王融云珠露春華反璿霜秋照晚

三婦兄弟

長安俠邪行大婦織綺羅中婦織流黃小婦無所為  
挾瑟上高堂大兄珥金璫中兄纓玉珥小弟無所為



鬪雞東陌達

淫豫大如襍

梁簡文淫豫歌淫豫大如襍瞿塘不可觸淫豫即灩

預也

黃姑

梁武云東飛伯勞西飛燕黃姑阿母時相見曲名東

飛伯勞歌

三六三五二八二七

梁簡文等擬古云少年年紀方三六新裝年紀纔三  
五年時二七猶未笄今年二八新紅臉

翩妍

徐陵雜曲云歌扇當窓似秋月碧玉宮奴自翩妍

鶴塵

梁武帝維濱云參差列鳳管容與起鶴塵

神丘

曹植遠遊云靈龜戴方丈神丘儼嵯峨

兩頭纖纖

徐朝云兩頭纖纖月初生半白半黑眼中睛  
膊膊膊初鳴磊磊落落向曙星沈約亦作每句以上四字為格易下三字要叶韻

五雜組

沈約云五雜組岡頭草往復還車馬道不獲已人將老  
悲歌二篇

悲歌可以當泣遠望可以當歸思念故鄉鬱鬱

累累又云欲歸家無人欲渡河無船心思不能言腸  
中車輪轉

三叟

應璩三叟詩古有行人陌上見三叟住車問三叟  
何以得此壽上叟前致詞室內嫗貌醜中叟前致詞  
量腹節所受下叟前致詞夜卧不覆首

木蘭

促織何唧唧木蘭當戶織不聞機杼聲但聞女歎息問

女何所思問女何所憶女亦無所思女亦無所憶昨夜  
見軍帖可汗大點兵兵書十二卷卷卷有爺名阿爺無  
大兒木蘭無長兄願為市鞍馬從此替爺征東市買駿  
馬西市買鞍韉南市買轡頭北市買長鞭旦辭爺娘去  
暮宿黃河邊不聞爺娘喚女聲但聞黃河流水鳴濺濺  
旦辭黃河去暮宿黑山頭不聞爺娘喚女聲但聞燕山  
胡騎聲啾啾萬里赴戎機關山度若飛朔氣傳金柝  
寒光照鐵衣將軍百戰死壯士十年歸歸來見天子

天子坐明堂策勳十二轉賞賜百千強可汗問所欲  
木蘭不用尚書郎願馳千里足送兒還故鄉爺娘聞女來出  
郭相扶將阿姊聞妹來當戶理紅粧小弟聞姊來磨  
刀霍霍向豬羊開我東閣門坐我西閣床脫我戰時  
袍著我舊時裳當窓理雲鬢對鏡貼花黃出門看火  
伴火伴始驚惶同行十二年不知木蘭是女郎雄兔  
脚撲朔雌兔眼迷離兩兔傍地走焉能辨我是雄雌

樂府題解

吳兢

伯牙聞海水得琴妙

伯牙學琴於成連先生成連曰吾師子春在海中能  
移人意與俱往至蓬萊山留伯牙曰此居習之吾將  
迎師刺船而去旬日不返伯牙但聞水聲傾洞山林  
冥杳禽鳥啼號乃嘆曰吾師謂移人意者豈此也援  
琴而歌頓悟其妙旨

白頭吟

司馬相如將聘茂陵女為妻文君作白頭吟云淒淒

重淒淒嫁女不須啼願得一心人白頭不相離示相  
如以自絕乃不聘

雉朝飛

齊宣王時牧犢子五十無妻見雉相隨而作此曲

別鵠操

商陵牧子妻五年無子父母將令改娶妻聞之作此

曲

烏夜啼



宋彭城王義康與義慶相見而哭帝怪之徵還大懼  
妓妾夜聞烏啼叩閣曰明當有赦乃改南州遂作此

曲

藁砧今何在

藁砧為夫也山上復有山言夫出也何當大刀頭問  
何時還也破鏡飛上天言月半時還也

圓碁燒敗襖

梁簡文風人詩云圓碁燒敗襖看子故依然

泰山吟

薤露歌一名蒿里行又名泰山吟

挽柩歌

漢武時李延年分二曲以薤露送王公貴人以蒿里送士庶令挽柩者歌又通謂之挽柩歌

烏生八九子

古詞言烏生八九子端坐秦氏樹言烏生子當在巖  
今來坐樹間故為彈所殺

陌上桑

舊說邯鄲女子姓秦名羅敷為王仁妻仁事趙王為  
家令羅敷採桑陌上趙王見而悅之置酒將奪焉羅  
敷善箏作此曲自明不從

東門行

古詞云出東門不願歸言士有貧不能安者拔劍將去  
其妻止之曰時清不可為非願共鋪糜不求富貴

君馬黃

言君馬黃臣馬蒼三馬同逐臣馬良嘆無罪見逐也  
明君自請往單于

明君即昭君避晋文諱改焉琴操載昭君齊人王穰  
女極美獻之元帝數年帝未見之因單于入朝帝宴  
之禁中後宮執事嬪御皆侍昭君在列酒酣帝曰欲  
以一女遺單于誰能行者昭君怨帝即出請往帝見  
悔之舊說不同

大垂手

言舞而垂手亦有小垂手及獨搖手之類

坎侯

漢武滅南越祠太一后土令樂人依琴造坎言坎坎應節也侯工人之姓因曰坎侯後訛為箜篌也

定情篇

漢繁欽所作若臂環致拳拳指環致殷勤耳珠致區區香囊致扣扣跳脫致問佩玉結恩皆婦人叙志之詞也

合歡詩

晉楊方所作食共並根穗飲共連理杯衣同雙絲綃  
寢共無縫裯坐必接膝行必攜手如鳥同心如魚比  
目利斷金石密逾膠漆也

大山小山

招隱詞本楚聲淮南王安所作大山小山擬詩之大  
雅小雅也

離合詩

孔融作離合其字以成文

薤露歌

田橫門人為之其詞曰薤上露何易晞明朝還復落  
人死一去歸何時

夏小正

雁以北方為居

正月雁北鄉先言鴈而後言鄉者見雁而後數其鄉  
也鄉者何其居也鴈以北方為居何以謂其居生且

長耳

魚負冰

魚陟負冰陟升也負冰者解蟄也

農緯耒

農緯厥耒緯束也

俊風

時有俊風俊者大也大風南風也何大于南風也曰合水必為南風解水必于南風生必于南風殺必于南



風故大之也

豺祭獸謂之祭

豺祭獸謂之祭獺祭魚謂之獸祭何也豺祭其類獺祭非其類也

小正

何以謂之小正以小著名也

萬用入學

二月萬也者干戚舞也入學也者太學也謂今時大

舍采也

鳩言

鳩言始相命也

祈麥實

三月祈麥實麥者五穀之先見者故急祈而記之也  
執駒攻駒

四月始執駒執駒者離之去母也報而升之君也攻  
駒者教之服車也

來降燕乃睇

五月燕乙也降者下也言來者何也莫能見始出也故曰來降言乃睇何也睇者盼也盼眎可為室者也百鳥皆曰巢燕言室者操泥而入人之室也

斗柄正在上

六月初昏斗柄正在上五月大火中六月斗柄正在上用此見北斗柄之不在當心也

狸子聲肆

七月狸子肇肆肇始也肆遂也言其始遂也

梟零

八月梟零降零而取之非剥也

陟玄鳥蟄

九月陟升也玄鳥燕也先言陟而後言其蟄者陟而後蟄故也

黑鳥浴

十月黑鳥鳥也浴也者謂飛乍上乍下也

養夜

時有養夜養長也

王狩

十一月王狩者言王之時田冬獵為狩

玄駒賁

十二月玄駒賁玄駒者蟻也賁者走于地中也

輶軒使者絕代語

楊雄

鬱悠惟慮願念思也

鬱晉宋魯衛間謂之鬱悠猶鬱陶也惟凡思也慮謀思也願欲思也念常思也

眉梨耄鮐老也

東齊曰眉言秀眉也燕岱北鄙曰梨言面色如凍梨也宋衛曰耄言八十為耄秦晉曰鮐言背皮如鮐魚也

饗飫食也

陳楚間相謁而食麥饘謂之饗注云饘糜也楚曰飫

上音非下音昨

朦朧豐大也

秦晉之間凡大貌謂之朦或謂之朧燕趙北鄙凡大  
人謂之豐故燕記曰豐人杼首長也燕趙度物園大  
為豐朦音忙紅反朧鵠也

娃娥窈窕艷美也

吳有館娃宮秦有榛娥臺秦晉間美貌為娥言娥娥  
也美狀為窈言閑都也美色為艷言光艷也美心為

窈言幽靜也榛音七

奕僣容也

注云奕奕僣僣輕麗貌也自關以西凡美容謂之奕或謂之僣又好目謂之順言流澤也僣與葉同

私纖蓀

音銳

穉杪策小也

自關至梁益間凡物小者謂之私繒帛之細者謂之纖凡草生而初達謂之蓀言鋒萌始出也穉年少也木細枝謂之杪燕之北鄙謂之策齊又謂之菱註云



如馬駿也傳曰慈母之怒子也折菱筍之其惠存焉耳

臺敵

東齊海岱之間謂之臺自關以西凡物力同者謂之臺敵

餽託媵音孕寄也

寓食為餽口傳言餽口四方是也凡寄為託寄物為媵

登孳健子

東楚間凡人獸雙產者謂之登孳秦晉間謂之健子  
自關以東謂之孳生女謂之嫁子言往適人也東齊  
壻為倩言可借倩也宮婢女廝謂之娘女廝言婦人  
之供給使者也健音輦孳音近患反娘與振同

亭公弩父

楚東海間亭父謂之亭公卒謂之弩父言主擔弩因  
以為名也

臧獲奴婢賤稱也

淮海間罵奴曰臧婢曰獲燕齊間民凡男而婿婢謂之臧女而婦奴謂之獲又亡奴謂之臧亡婢謂之獲

醜稱爾

褸裂湏捷敗也

南楚凡人貧衣被醜弊謂之湏捷或謂褸裂注云衣壞貌也左氏曰華路褹褸以啟山林華路柴車也褸音縷

衲襖箇衲倒頓校衲

秦晉間謂無緣之衣曰衲襖江湘之間謂複襦曰箇  
衲大袴謂之倒頓小袴謂之校衲音皎了

扉履屨

徐充間謂之扉音翡自關而西謂之屨中有木者謂  
之履舄麻作者曰不借

酢鉶

甌自關西東謂之甌或謂之觥或謂之酢鉶甌音言

藺音岑 鋤音雷

縞縵

關東謂縵關西謂之縞縞縵皆汲繩也縞音槁

渠拏

杞宋魏間謂之渠拏或曰渠䟽又有齒為杞無齒為拏拏音諾諸切

特介

物無偶曰特獸無偶曰介傳曰逢澤有介康

鋪頒索也

東齊曰鋪頒秦晉抖數鋪音專

魏盈怒也

燕之外郊朝鮮之間凡言呵叱者謂之魏盈

李父

陳魏間謂虎為李父江淮謂之李耳言虎食物值耳

即止觸其諱也又謂之於脆音烏塗關西或謂虎伯

都

鷦鷯

鳥似雞色五色冬亦無毛常赤保晝夜鳴音侃旦宋  
魏間謂之定甲或曰獨春言好自低昂也

飛鼠

蝙蝠自關以東謂之鵬翼或曰飛鼠或曰仙鼠北燕  
謂之蠟螻音職墨

守宮諸名

秦晉謂之守宮或曰蠪螭又曰蜚易又曰螻蛄其在

澤中者易蜴楚曰蛇醫又曰蝾螈又曰蜺蜺桂林大者曰蛤蚧盧纏斯侯榮原六音

舟楫諸名

江湖間大船曰舸小舸曰艇

音

小艇曰艚船小艚船曰

艇長而薄者曰艚

音

短而深者曰舫

音

小而深者曰

櫓

音

方舟謂之橫船舟謂之浮梁船造楫曰橈或曰

櫓所以穩棹曰槳槳搖櫓小樞也所以縣櫓曰緝繫

緝索也所以刺舟曰篙維謂之鼎係船也首謂之閣問



今江東呼船頭為飛閭或曰鷁首今舟前所作青雀是也後曰舳今呼為舵舳制水也偽謂之伋伋不安也伋音五忽反偽者言舳搖動之貌也

螻蛄曰杜狗

南楚間名

笛師

螻燕趙間名曰螻蛄

音蒙翁

其小者螻蛄大而無螻者曰

螻注穿竹木作孔有竅者謂之笛師

鼻祖

鼻始也獸之初生謂之鼻人之初生謂之首梁益謂鼻為初或謂之祖

巨斧

兗豫間謂塘螂為巨斧

劇談錄

康駢

黃中君

竇庭芝與卜者胡盧生相善一日謂庭芝曰君家禍

將至非遇黃中君鬼谷子不可救庭芝物色求之得  
李鄴侯泌傾家結之未幾朱泚之亂庭芝陷賊事平  
德宗命誅之泌以前事上聞特貸其死德宗曰疑所謂  
黃中君蓋是朕謂卿為鬼谷子何也

白龍皮

李德裕當盛暑會客以金盆注水漬白龍皮於坐側  
湏臾涼颼爽氣凜然如高秋

玉蕊真人

唐昌觀有玉蕊花甚盛一日有女子容色婉麗遶花而行觀者如堵忽折花數枝曰昔有玉峯之約自此可以行矣飄然乘空而去

### 鍊炭

洛下有豪子飲食鮮華有李使君亦尚豪侈為具召之曾不下筯至飯李曰試食此以炭炊豪子勉食一匙曰凡以炭炊先燒熟謂之鍊炭方始無煙氣此亦非也

白傳舟

盧簡辭遊伊水別墅忽見二童操蓬艇中有白衣人  
與僧偶坐後以銅甌而炊宛若神仙問之乃白傳舟  
往行香山也

御史灘

河南伊闕縣前每僚佐有入臺者即水中灘出石  
礫金沙清澈可愛牛僧孺為尉一日報灘出僚共觀  
之有老吏曰此必分司御史若是西臺當有一雙鷗

鵜僧孺舉杯祝曰既能有灘何惜鵲鵜言訖一雙鵲  
鵜飛下灘中不旬日間僧孺遂拜察院

天津老人

裴晉公微時羈遊洛中一日策蹇上天津橋時淮西  
不庭已數年矣有二老人倚柱立語云蔡州何時得  
平見晉公愕然而退有僕夫在後聞其語曰適憂蔡  
州未平湏此人為將僕遽告公曰見我龍鍾故相調

戲

謫仙怨

明皇幸蜀妃子既死一日登高山望秦川謂高力士  
曰吾聽張九齡言不至此遣使祭之吹笛詞號謫仙  
怨也

李賀却元稹

元和中李賀以歌詩著名時元稹年已壯以明經中  
第亦攻篇什願與賀交執刺謁賀賀見刺却之曰明  
經及第何事見賀稹慚未幾制策登科擢為禮部郎

官乃議父名晉不合舉進士時輩亦排之賀竟不第

炙轂子

王獻

百合履

二儀錄云大厯中進五朶草履建中間進百合草履

八牛弩

漢初得八牛弩以射楚軍矢達十里外

迎春髻

漢宮髻名



飛仙髻

漢武時王母降諸仙髻皆異人間帝令宮中效之號

飛仙髻

芙蓉髻

晉惠時宮中髻樣如芙蓉因以名也

紅藍

二儀錄燕脂本關氏所造而以紅花為之中國紅花

為紅藍

水芝

蓮花

歷代畫斷

朱景玄

轉規成圓

吳道子畫圓光最在後衆觀下筆如風落電掃轉規  
成圓歡呼驚動坊市

道玄一日之跡

明皇令道玄往嘉陵觀山水回奏云臣無粉本記在

心乃令圖之一日而成是時李思訓亦善山水帝復令貌數月方畢帝曰思訓數月之功道玄一日之跡此並皆佳妙也

地獄變相

吳道子畫地獄變相都人懼罪兩京人屠沽不集應手生枝

張藻畫也云應手生枝則潤如春澤也

長門怨

及乞巧圖望月圖皆是張萱畫也

翠彩生動

邊鸞善畫花鳥奇蜂異蝶等畫孔雀一正一背翠  
彩生動

王墨

王伶善潑墨凡作圖障先以墨潑脚楚手捫隨成物  
像皆妙絕故謂之王墨

畫輞川圖

王維畫此圖山谷鬱盤雲水飛動意出塵外怪生筆  
端嘗自題詩云夙世繆詞客前身應畫師

通神之佳手

開元中諸衛將軍李思訓得山水之妙明皇令畫大  
通殿壁詔諭之曰卿所畫夜聞水聲真通神之佳手

拾遺記

王嘉

華胥洲

春皇者伏羲之別號所居之都有華胥之洲

青虹繞神母

神母遊洲上有青虹繞神母即娠歷十二年生伏羲

丹渠

神農時陸地生丹渠駢生如車蓋

豢龍圃

香露下流成池因為豢龍圃

霞漿

時有流雲洒液名為霞漿

九穗禾

丹雀啣九穗禾

昆臺

黃帝厭世于昆臺乃鼎湖極峻處也

沉榆之香

詔羣臣受德教者先燃沉榆之香

沙瀾

洄流如沙湧起成瀾名沙瀾

沙海

仙人甯封食飛魚而死二百年後生世呼甯先生其  
遊沙海頌曰青渠的皪千載舒百年暫死餌飛魚

璇宮夜織

少昊母曰皇娥處璇宮夜織白帝之子降其室作歌  
曰驅光逐景窮水域璇宮夜靜當軒織

浮金鐘

顓頊有浮金之鐘沉明之磬羽毛微物拂之則聲聞



百里

貫月查

堯時有巨查浮于西海查上有光若星月常繞四海  
十二年一週天名貫月查又名掛星查羽仙棲息其  
上

重明集

祇支國獻重明鳥似鳳而小云能攘妖災國人每埽  
戶以望其集也

五老

舜時有五老人遊行舜乃作五星祠祭之此夜五大星出

珠丘

舜葬蒼梧之野有鳥如丹雀吐五色氣如雲名憑霄銜土成墳壘珠成丘壘名曰珠丘

玉簡量天地

禹遊龍門八神探玉簡授之長尺二寸可度量天地

乘雲繞日

傳說夢乘雲繞日而行歲餘帝聘之

蜂旗

武王伐紂有蜂如丹鳥集王舟因以繪旗其舟曰蜂

舟

雲實

成王時外國獻鳳雛載以瑤華之車駕以赤象飲以

瓊漿飴以雲實

鵲扇

昭王時外國獻丹雀拾其脫羽以為扇甚奇麗名鵲

扇

冰荷

穆王列璫膏燭覆以冰荷不使光遠荷出冰壑火不

能鎔

冰桃碧藕

西王母見穆天子玉帳高會進萬歲冰桃千年碧藕

百子蓮

又進素蓮一房百子

靜瑟

員山有林風振地而林不動以為琴瑟故曰靜瑟也

解麋紱

孔子始生徵在得麟以繡紱繫其角而縱之哀公十

四年獲麟角有繡紱猶在孔子嘆之乃作春秋

月鏡

靈王時外方貢月鏡其白如月照人寒若冰雪名曰月鏡

手畫日月

朝房異域人能以丹砂書手作日月狀光可照見百步

方瞳老叟

老聃居山有老父五人方瞳玉面手握青筠杖共談五地五方五行之相也

金壺龍檢

浮提國獻善書人二出肘間金壺四寸上有五龍之檢壺中如漆洒地皆成篆隸佐老子作道德經數萬言老子刪除之留五千言也

寶井

范蠡藏銅鍤之處也

縈塵

燕昭王有舞女體甚輕名縈塵

指端浮圖

沐胥國道人尸羅於指端出浮圖十層高三尺人長五六分各執幢蓋繞塔而行

螺舟

宛渠之民乘螺舟而至形似大螺云行海底而不濕  
子午臺

燕昭王起雲明殿臺窮極珍巧子時起工午時成名  
子午臺



金銀鳬鴈

始皇墓中以金銀為鳬鴈後或飛出有人得之者

雲雷室宮

成帝造飛行殿其形疾若風雷號雲雷殿

崆峒靈瓜

明帝時燉煌獻異瓜云崆峒靈瓜四劫一實焉

一土三田

安帝時王傳穿井得銘曰一土三田軍門主簿以億

錢翰官得中壘校尉

不雨雷

光武皇后弟郭况家工冶之聲不絕人謂郭氏之室  
不雨而雷

瓊厨金穴

京師謂郭氏為瓊厨金穴

經神學海

鄭康成為經神何休為學海

經苑

任末好學河洛秘奧皆記于柱壁學者就錄謂之任氏經苑

書倉

曹曾積石為倉以藏書名曹氏藏書倉

針神

魏文美人妙于針工能暗中裁制號針神

機絕針絕絲絕

吳王趙夫人能於指間織錦號機絕又能於方尺帛  
上綉五岳河海之狀號針絕又能以神膠續髮織成  
慢仍一髮析為數縷輕若煙氣號絲絕

百濯香

孫亮為四愛姬造香百浣不歇號百濯香

九醞酒

張華為九醞酒若飲不醉不叫笑不動則消爛腸脾  
謂之爛腸酒

玉錢

晉因瑋國獻玉錢其文曰天壽永吉

側理紙

張華進博物志以于闐青鍊硯遼西麟角筆南越側理紙南人多以青苔為紙其文理縱橫因謂之側理紙耳

金苔

晉文帝大始中外夷獻蔓金苔宮人有幸者以苔賜

之光照室中又名夜明苔

房老

石季倫愛婢名翔風妙別玉聲而觀金色年三十為  
新進所排退為房老

瑤臺十二

崑崙山有瑤臺十二各廣千步皆五色玉

芝田蕙圃

瑤臺第九層有芝田蕙圃皆數百頃盡仙人種植

嗅石獸

瀛洲有嗅石獸嗅地則知有金玉吹石則開金砂寶  
璞粲然而可用

干將莫耶

昆吾山有獸如兔食鍊膽腎皆精鍊吳武庫中兵刃  
俱盡而識封如故檢之得二兔殺之膽腎皆鍊因鑄  
以為劍雄者曰干將雌者曰莫耶

三壺

海中三山其形如壺方丈曰方壺蓬萊曰蓬壺瀛洲  
曰瀛壺

八鴻

八方之名鴻大也

鼎占休咎

禹鑄九鼎五者以象陽數四者以象陰法使工師以  
雌金為陰鼎雄金為陽鼎鼎中水常滿以占休咎夏桀  
之亡鼎水皆沸及周之衰亦感震焉



師涓四時樂

師涓於衛靈公時四時樂春有離鴻去鴈應蘋之歌  
夏有明晨焦泉朱華流金之調秋有商風白雲落葉  
吹蓬之曲冬有凝河流陰沉雲之操

消暑招涼珠

黑蚌珠能消暑燕昭王得之暑月懷珠體自涼號消  
暑招涼之珠

太乙吹青藜

劉向校書天祿閣有老人著衣植青藜杖叩閣見向  
暗中誦書老人吹杖端焰然因以照坐與向說開闢  
以前事授以五行洪範之文問其姓氏云我是太乙  
之精聞天帝卯金之子有博學乃出懷中竹簡天文地  
理之圖書并以授向而去

### 舌耕

賈逵口授經傳致粟盈倉謂之舌耕嘗語人曰人而  
不學行尸走肉耳

望舒草

晉武時浮支國獻望舒草如荷葉而紅月出則舒月  
沒則卷

芳塵

晉武于太極殿起樓春雜寶異香屑候風作則吹之  
故名曰芳塵

粘雨

又于樓上以酒洒塵名曰粘雨

四面風

崑崙山有四面風東南西北一時俱作

祛塵風

又有祛塵風若衣服垢污吹之則潔

金霧

岱輿山南有平沙千里色如金風起吹沙名金霧或

謂金塵

風扇

後魏人信都芳造風扇候二十四氣每一氣至扇舉焉  
龍芻

東海有島曰龍駒川穆天子養八駿處島中有草名  
龍芻馬食之日行千里語曰一秣龍芻化龍駒

紺霜

廣延國霜色紺碧

璿宮

后宮曰璿宮

續脉

周昭王夢羽人論仙欲易王心以手指向前點心乃  
痛于綠壺中取藥名曰續脉食之痛止

毛車

異國入貢乘毛車甚快

紺雪

周穆王時西王母獻崦州紺雪

雲薇

晉武寧中於金墉城種異菜名雲薇雲芝

頗陵

西國菜名僧攜其子入中國訛為波稜

八駿名

穆天子八駿名絕地翻羽奔霄越影踰暉起光騰霧

挾翼

大業雜記

杜寶

五色飲

仁壽間壽禪師造五色飲以扶芳葉為青飲援稷根  
為赤飲酪漿為白飲烏梅為玄飲江茝為黃飲茝音桂

五香飲

沉丁檀澤蘭甘松

四時飲

謝諷造春以桃夏以酪秋蓮房冬枸杞

樓闕芝

東都生芝狀如樓闕又或有如赤子者



水飾圖經

煬帝令杜寶修水飾圖經十五卷以上巳日會羣臣  
於曲水有神龜負八卦黃龍負圖黃魚雙躍白魚入  
舟呂望釣磻溪金人捧劍周處斬蛟許由洗耳莊惠  
觀魚屈原沉汨羅等凡七十二事並刻木為之

紺珠集卷八